


SENIOR CERTIFICATE EXAMINATION
SENIORSERTIFIKAAT-EKSAMEN



FEBRUARY / MARCH
FEBRUARIE / MAART

2005

SETSWANA PUO YA BOBEDI
SEEMOGODIMO

(Pampiri ya Ntlha)

HG

931-1/1

SETSWANA SECOND/ADDITIONAL LANGUAGE HG: Paper 1

6 pages



X05



COPYRIGHT RESERVED / KOPIEREG VOORBEHOU
APPROVED BY UMALUSI / GOEDGEKEUR DEUR UMALUSI



LEFAPHA LA THUTO LA GAUTENG

TLHATLHOBO TSA MAKGAOLAKGANG

SETSWANA PUO YA BOBEDI
SEEMOGODIMO
(Pampiri ya Ntlha)

NAKO: Diura tse 2

MADUO: 80

DITAELO:

- Pampiri e, e arotswe ka dikarolo tse tharo, A, B le C.
- Araba dipotso go tswa mo dikarolong di le tharo
- Karolo B tlhophisa temana e le nngwe fela.
- Tlhaloganya potso pele o e araba
- Rulaganya tiro ya gago sentle

**KAROLO YA A
TEKATLHALOGANYO**

POTSO 1

Buisa temana e e latelang mme morago o arabe dipotso tse di fa tlase.

Rre mongwe wa Tshwinyane a lebelela setlhare sa moswa-o-eme fa gautshwane le bokokoanelo. Se ne se tsentswe gare ke ditlhatsana tse di mmitlwa e bile di khurumeditse kutu ya sona. A fitlha a se tshikinya ka maatla a sekolwane a ba a utlwa gore se a dumela. A se tlogela go le gonnye gore a eme sentle gonne ditlhatsana tse di neng di le fa tlase ga sona di dira gore a se tshware ka go gabalala. Nko ga e na mosola. Fa a se tlogela sa sala se leketla, ya re a bona ditlhatsana di tshikinyega a ithaya a re di tshikhintswe ke ena. A leka go di kgapha ka leoto gore a tle a kampane le kutu ya setlhare a le gauifi; a kgopa sengwe se se botobe ka fa tlase ga tsona. Fa e kete o tla gamarega mongwe a re, "Bona koo, rra, selo ke seo!" Ga tsapoga namane e tona ya phage ka fa tlase ga dinao tsa gagwe. Go ne go iketlilwe, go se na ope yo o ipaakanyeditseng go kolopa, bontsi bo beile marumo fa fatshe. Ya re e re e tlolela mo go ena, a inama ka bonako. Fa e setlhama fa morago ga gagwe, a tlolela ditlhatsana moseja ole. Rre yo o neng a opa mokgosi a e kgotla ka logong, ya mo tshosa ka dinala; a tlolela morago. Go bonala gore o ne a kgotšwa, a thekesela a ya go pharama godimo ga mebitlwa. Ya re e re e a mo tlolela, Selepe a e bona ka molamu o o tlhogo tona mo dinokeng ya ba ya kotama jaaka ntšwa e tle e kotame fa e letetse go tla go fiwa dijo. Ka go bona dinoka tsa yona di ganelela fa fatshe a ithaya a re e feletswe, a e atamela go e sedila dingana a le gauifi. Ya mo fopha ka maroo mo mokotleng, ba ya go wa mmogo, dinala tsa yona di nwetse mo legetleng la molema. Manokonoko a teng a kgaola ditshika tsa pelo. A re o leka go kua a athama fela, lentse la gana go tswa, a leka go bitsa Motshedise, ga ganega. Rraagwe Nakedi le bangwe ba babedi, ba bolaisana setšhwane go ya gae. Ba ne ba bone, go lekane, ba sa eletse go bona tiragalo yotlhe. Kana magatlapa ga a ke a tlogela bana bosielana. Ba betsa ditlhare ka mafatlha; di ba epa dihuba, madi a tshologa mme tsela e bulega.

1.1 Tiragalo e e diragetseng mo temeng e, e diragalela kwa kae?

(2)

- 1.2 Goreng rre wa Tshwinyane a ne a ithaa a re ditlhatshana di tshikintswe ke ena? (2)
- 1.3 O ne a leka go dira eng fa morago ga tiragalo e? (2)
- 1.4 Ke eng se se botobe se rre wa Tshwinyane a neng a se kgopa? (2)
- 1.5 Banna ba ba neng ba na le ena ba ne ba le kae le gona ba dirang? (2)
- 1.6 Rre wa Tshwinyane o dirile eng gore phologolo e, e se ka ya mo tlhasela? (2)
- 1.7 Ke tiragalo efe e e batlileng go tsenya rre yo o neng a opa mokgosi letshogo? (2)
- 1.8 Selepe o ne a dirang ka phologolo e fa e re e tlolela monna yo o mo go 1.7 (2)
- 1.9 Ke tiragalo efe e e botlhoko e e neng ya wela Selepe. Tlhalosa ka botlalo. (4)
- 1.10 Rraagwe Nakedi o ne a dirang fa a ntse a lebile tiragalo e? (2)
- 1.11 Fa Selepe a sena go e bona ka molamu mo dinokeng phologolo e, e ne ya kotama jang? (2)
- 1.12 Ke eng se se neng se dira gore a ithee a re e feletswe? (2)
- 1.13 Goreng banna ba ne ba betsa ditlhare ka mafatlha? (2)
- 1.14 Go ne ga diragala eng fa monna a leka go kua? (2)
- 1.15 Fa a kua jaana o ne a leka go bitsa mang? (1)
- 1.16 Tlhalosa mabolelo a a latelang:
- 1.16.1 Go baa marumo fatshe (1)
- 1.16.2 Go sithama (1)
- 1.16.3 Go tila (1)
- 1.16.4 Go bolaisana setšhwane. (1)

PALOGOTLHE YA KAROLO YA A: [35]

KAROLO YA B
TSHOSOBANYO

POTSO 2

Araba 2.1 KGOTSA 2.2

- 2.1 Buisa ditemana tse di latelang mme morago o sosobanye e le NNGWE ya tsona. Netefatsa gore bokao bo se fetoge:

Temana A

Khuduego ya feretlha mogopolo wa ga Kesenkang go fetelela; jaaka a bona morwadie a setse a mo lemogile. Go tlhobaela bosigo le gona go setse go oketsa matsutsuba mo sefatlhegong sa gagwe. Gopane fa a ntse a ya gae a lemoga gore; mosadi o jwa ke sengwe; fa e se bolwetse, ke go balabala ka pelo. Ya re a mmotsa a re "Ke tshwenngwa ke mogopolo wa me. Ga ke itse gore go tla diragala eng ka Mmantsipe, ngwanake, fa a fitlha kwa Gauteng."
"O tshwenngwa ke dilo tse di sa tshwanelang. Ba ba tlholang ba tloga mo gae bona ba diragalelwa ke eng? A ena ga a tshwane nabo? Tlogela go tlhola o balabala, mma; palabalo eo e tla tshwenya wena fela, Mmantsipe ena a sa re sepe, mme e le ena yo o ka bong a tshwenyega, a sa robale."

Merwalo e a wa: Cornelius Morake

(10)

KGOTSA

2.2 Temana B

Tlhangwe, monna wa Segametsi, o ne a ithobalela le badimo ka ngwaga wa kete kgolarobongwe somamatlhano supa, Motsheganong a tlhola malatsi a le somamabedi. O ne a tshwerwe ke bolwetse jwa go wa, mme jwa mo kgomarela dingwaga di le pedi pele bo mo digela ruri. Ke bona bo neng jwa mmusa kwa Gauteng pele ga nako ya botsofe mme jwa mo tlhotlhora sefalana sa polokelo le fa se ne se sa tshola sepe, madi a feletse kwa gaabo ona. Dingaka di lekile go mo alafa tsa bo tsa leba fela. A itsamaela jalo a sa tlogelela mosadi le bana sepe fa e se ...
Ba losika lwa gaabo ba ne ba kokoana ka bonako go tla go rerisana le Segametsi ka phitlho ya monna wa gagwe. "Nna ka re a moswi a tlhole la ka moso e re ka Labone a fitlhiwe. Go baya setopo molatsa malatsilatsi go go dirwang ke bangwe gompiono ga ke go beye sebetse."
Solofelang a bua go thuba tidimalo e e neng ya latela mafoko a tlhoboso ka monnamogolo wa moagisani nabo. Ga go a ka ga nna ope yo o bulang molomo go mo tlatsa kgotsa go mo fokotsa. Segametsi o ne a ipharile kwa motsheo a dikaganyeditswe ke basadibagolo ba ribegile difatlhego fa fatshe.

Magana go utlwa: J.E Setshedi

(10)

PALOGOTLHE YA KAROLO YA B: [10]

KAROLO YA C
TIRISO YA PUO

POTSO 3

Buisa temana ke eo, o tle o itse go araba dipotso tse di tla e latelang:

Ga twe e rile bogologolo ga bo go le monna a bidiwa Lesarwa Rakgori a na le monna yo mongwe, ba tsamaya ba tsoma. E rile ba ntse ba tsamaya yo mongwe a raya yo mongwe a re, "Monna, fa tau e ka re kgorogela re a bo re ka dira eng?" Yo mongwe a re, "Re ka e tshwara, ra e bolaya." Ke fa e re ka bonakonyana fela tau ya bo e kgweloga, e tlolela yo mongwe. E rile e mo gatile ka maroo Lesarwa a e phamola ka ditsebe. Ba lwa foo, e le mo tshokologong ya letsatsi, le tla tloga le phirima.

E rile ba ntse ba lwa jalo, tau e setse e lapile le Lesarwa a setse a lapile, tau ya phamola letsogo la gagwe, ya mo tlhahuna menwana. E rile e ntse e mo tlhahuna menwana jalo a betelela letsogo la gagwe kwa teng ga legano la yona, a e kgama, a e tshwere ka letsogo le le lengwe fela. Tau ya tlhoka ka fa e ka ntshang mowa ka teng. Ya re e a tlola, Lesarwa a re, "Re kopane re le banna, re tshwana. Yo e leng monna tota o tla itshupa gompieno." A betelela letsogo la gagwe jalo kwa teng ga legano la tau go fitlhela e repa, e wela fa fatshe, e swa.

Tsala ya ga Lesarwa ya tlhoka mafoko, ya sala e athame fela. Lesarwa a mo raya a re, "Ke ntse ke re ke tsamaya le monna, ntekwane ke tsamaya le mosadi." Go tloga ka lona letsatsi leo batho ba itse fa Lesarwa e le yona tau, tshetlha ya dikgwa.

3.1 Nopola mefuta e e latelang ya maina go tswa mo temaneng:

3.1.1 Leinatswako

3.1.2 Leinatota

3.1.3 Leinakgongwa

3 x 1 = (3)

3.2 Dirisa lesupi **leo** mo dipolelong jaaka:

3.2.1 Sedirwa

3.2.2 Letlhalosi la felo

2 x 2 = (4)

3.3 Dirisa **matlhalosi** a a latelang mo dipolelong:

3.3.1 Gompieno

3.3.2 Fa fatshe

2 x 2 = (4)

3.4 Dirisa mafoko a a latelang mo dipolelong go supa bokao jo bo farologaneng le jwa temana:

3.4.1 Mowa

3.4.2 Tlola

2 x 2 = (4)

3.5 Dirisa **makopanyi** a a latelang mo dipolelong tse di tlabosang:

3.5.1 fa

3.5.2 le

2 x 2 = (4)

- 3.6 Neela bontsi jwa **maemedi** a a latelang:
- 3.6.1 Yona
- 3.6.2 Lona 2 x 1 = (2)
- 3.7 Nopola motlhalana go tswa temaneng o go dirisitsweng **lebotsi** mo go ona. 2 x 1 = (2)
- 3.8 Kwalolola dipolelo tse di latelang mme o **thalele madiri** a a bontshang **katoloso ya tirana le pheti**.
- 3.8.1 Ba bolaisana setshwane go ya gae.
- 3.8.2 E rile e mo gatile ka maroo, Lesarwa a e phamola ka ditsebe. 2 x 1 = (2)
- 3.9 Nopola mafoko a MABEDI a a nang le bokao jwa:
- 3.9.1 Thapameng
- 3.9.2 Tlhasela 2 x 1 = (2)
- 3.10 Naya **malatodi** a mafoko a a thaletsweng:
- 3.10.1 Ba lwa foo, e le mo tshokologong ya letsatsi le tla tloga le phirima.
- 3.10.2 Go fitlhela e repa, e wela fa fatshe e swa. 2 x 1 = (2)
- 3.11 Naya **makaelagongwe** a mafoko a a latelang:
- 3.11.1 Yo e leng monna o tla itshupa gompieno.
- 3.11.2 A betelela letsogo la gagwe kwa teng ga legano la yona. 2 x 1 = (2)
- 3.12 Bolela gore ke dikapuo dife tse di dirisitsweng mo dipolelong tse di latelang:
- 3.12.1 Batho ba itse fa Lesarwa e le yona tau, tshetlha ya dikgwa.
- 3.12.2 Ke ntse ke re ke tsamaya le monna ntekwane ke tsamaya le mosadi. 2 x 1 = (2)
- 3.13 Naya tlhaloso ya maele a a latelang:
- 3.13.1 Go tlhoka mafoko
- 3.13.2 Go atlhama 2 x 1 = (2)

PALOGOTLHE YA KAROLO YA C: [35]

PALOGOTLHE: 80